



*Senin, 20 Januari 2025*  
**Ogen: Jesaya 40:31**



**“Tetap Ipelimbarui Tuhan Gegehta”**



**A**di salah banci sipekena, adi la icubaken kai si man pekenan? Enda sada statmen bas sekalak bibi beru Ginting sanga ia ngajarken anak seninana. Ia ngajuk anak e gelah ula mbiar ncbuken sada-sada dahin amin gia langa pernah kuitna. Ula mbiar gagal. Padin pernah gagal asangkan la pernah erbahan kai pe. Enterem kel kita mbiar salah, mbiar gagal. Padahal bas geluh enda labo terpisahkan keberhasilen ras kegagalen, kiniseran ras keriahen erdalan radu ras pegancihen desken nahe kawes ras kemuhen. Thomas Alpha Edison penemu bola lampu seh ratusan kali ia gagal i bas percubanna erbahan bola lampu, mbue biaya keru, mbue putus asa, tapi perban la ia ngadi erusaha, dungna asa sendah sinikmati ulih kegagalenna, sabap arah kegagalen e ia erlajar, kai kelemahan si arah lebe.

Kegagalen e la seri ras talu. Talu e ertina lanai ngasup ngelawan adi i bas pertandingan tinju. Entah la memenuhi syarat/standard/kriteria penilaian. Adi gagal langa ruli, ertina banci denga ipala-palai, lit denga kesempatan. Adi nuan-nuan ku juma gagal panen umpamana, banci denga suan ulihi. Alu pengarapen sekali enda pagi maba ulih. Gagal bas sekolah, banci denga ulihi, alu tutus erlajar gelah tahun berikutna banci naik kelas entah lulus sekolah. Gagal i bas erteman, lit denga kemungkinan ndatken teman si mbaru. Ertina asal la putus asa mbue denga si mehuli si banci ilakoken.

Tuhan kap sinjamini bangsa Israel si gagal e, maka tetap ipelimbaruina kari gegeh bangsaNa, desken rajawali kabang, tangtangna e mberat kin, tapi dungna lanai bo perlu iasamkenna gegehna, sipenting tetap perkabangna, kuasaina bana, angin sirembus e si mabai perkabangna reh ganjangna. Tuhan ngidah asakai gegeh ras kengasupennta. I bas kita tetap erjuang labo ipeturutna kita si sada. E maka ula ngadiken adi paksana kam genduari erjuang, ntah i bas pelayanen, i bas jabu, i bas pendahin, i bas kerina dampar perjuanganndu. Celus rusur labo masalah, tapi adi la nggit keke e me ketalun si tuhu-tuhu.

*Asa gegeh, asa ngasup ras asa lit denga kesempatan, kekeken*